



## MAMPU mahu teroka lebih banyak peluang kerjasama dengan Media Prima

Muhammad Yusri Muzamir - Oktober 30, 2023 @ 1:41pm

[yusri.muzamir@bh.com.my](mailto:yusri.muzamir@bh.com.my)



Ketua Pengarah MAMPU, Datuk Rodzi Md Saad bersama Pengerusi Kumpulan Media Prima, Datuk Seri Dr Syed Hussain Aljunid ketika lawatan Sri Pentas. - NSTP/Eizairi Shamsudin

KUALA LUMPUR: Unit Pemodenan Tadbiran dan Perancangan Pengurusan (MAMPU), Jabatan Perdana Menteri (JPM) bertekad memperkasa penyampaian perkhidmatan awam kepada rakyat, terutama menerusi platform digital.

Justeru, Ketua Pengarahnya, Datuk Rodzi Mat Saad, berkata pihaknya mahu menerokai lebih banyak peluang kerjasama dengan Kumpulan Media Prima Berhad (Media Prima) bagi tujuan itu.

Ketika ini, katanya, MAMPU sedang memperkasa agenda transformasi pendigitalan perkhidmatan awam secara end to end bagi memudahkan rakyat berurusan, sekali gus mengelak pelbagai isu, antaranya ketirisan dan integriti.

"Kita ada struktur penyelarasan melalui mekanisme jawatankuasa yang dipengerusikan Perdana Menteri, Datuk Seri Anwar Ibrahim, manakala Ketua Setiausaha Negara, Tan Sri Mohd Zuki Ali di sektor awam.

"Keseluruhan proses ini berjalan baik antara semua agensi dan kementerian. Sebarang usaha akan dibentang untuk mendapatkan persetujuan bersama yang diputuskan jawatankuasa dipengerusikan Tan Sri Mohd Zuki," katanya.

Rodzi Beliau berkata demikian pada sidang media selepas mengadakan kunjungan korporat ke Sri Pentas, di sini hari ini.

Dalam kunjungannya, beliau diiringi Pengerusi Media Prima, Datuk Seri Dr Syed Hussain Aljunid dan Pengarang Urusan Kumpulan The New Straits Times Press (Malaysia) Berhad (NSTP) merangkap Pengarang Kumpulan BH, Datuk Ahmad Zaini Kamaruzzaman.

Hadir sama, Ketua Pegawai Operasi Media Prima Omnia, Datuk Mohd Efendi Omar; Ketua Pegawai Eksekutif Media Prima Audio, Nazri Noran serta Timbalan Pengarang Kumpulan Jabatan Berita dan Ehwat Semasa Rangkaian Televisyen Media Prima, Azhari Muhidin.

Sementara itu, Rodzi berkata, penerimaan digitalisasi dalam kalangan penjawat awam kini pada tahap berbeza mengikut penguasaan dalam bidang digital, selain mengakui yakin ia dapat dikuasai sepenuhnya kakitangan kerajaan dalam masa terdekat.

"Bagi persiapan kerajaan pula, MAMPU bersama agensi sentiasa menyelaras untuk meneliti ruang penambahbaikan digitalisasi yang mahu diperkenalkan supaya diterima baik masyarakat dan negara.

"Kerajaan juga sentiasa menggalakkan digitalisasi secara kempen supaya dapat meningkatkan keyakinan orang ramai, terutama aspek keselamatan penggunaan, dari segi data yang sentiasa terpelihara dan diberi keutamaan," katanya.



Ketua Pengarah MAMPU, Datuk Rodzi Md Saad bersama Pengerusi Kumpulan Media Prima, Datuk Seri Dr Syed Hussian Aljunid ketika lawatan Sri Pentas. - NSTP/Eizairi Shamsudin